

## Terapkan pendekatan kreatif tarik pelabur ke Malaysia

Oleh Rafidah Mat Ruzki - September 6, 2022 @ 9:47pm

[fidahruzki@bh.com.my](mailto:fidahruzki@bh.com.my)



Perdana Menteri, Datuk Seri Ismail Sabri Yaakob bersama Menteri Luar Datuk Seri Saifuddin Abdullah ketika menghadiri Majlis Perasmian Persidangan Ketua-ketua Perwakilan Diplomatik Malaysia Ke-9 (HOMC9) di Wisma Putra hari ini. - Foto BERNAMA

PUTRAJAYA: Ketua-Ketua Perwakilan Diplomatik diminta menerapkan pendekatan yang lebih kreatif dalam usaha menarik kembali kemasukan lebih ramai pelabur asing ke Malaysia.

Perdana Menteri, Datuk Seri Ismail Sabri Yaakob, berkata semua pihak juga perlu cakna dalam meneroka serta menarik pelaburan daripada negara-negara baharu, terutamanya apabila dunia sedang rancak mencari destinasi pelaburan yang stabil di era pasca pandemik.

"Pada masa sama, saudara dan saudari perlu turut memberi fokus kepada pembukaan peluang pasaran kepada produk-produk eksport Malaysia.

"Beberapa bidang tertentu seperti perdagangan, pendidikan dan pertanian perlu diberi penilaian yang menyeluruh ke arah memastikan Malaysia sentiasa di landasan tepat, dan tidak ketinggalan dalam dinamik perkembangan global dan cabaran semasa khususnya," katanya ketika menyampaikan ucapan utama sempena Persidangan Ketua-Ketua Perwakilan Diplomatik Malaysia Ke-sembilan (HOMC9) Secara Maya, malam ini.

Yang turut hadir Menteri Luar, Datuk Seri Saifuddin Abdullah dan Ketua Setiausaha Negara, Tan Sri Mohd Zuki Ali.

Perdana Menteri berkata, kerjasama bersepadu rentas agensi menjadi kunci utama memastikan pelaburan asing ke dalam negara terus mengalir sekali gus membantu proses pemulihan ekonomi negara.

Justeru, Ismail Sabri mengingatkan Perwakilan Diplomatik Malaysia, untuk mematuhi garis panduan yang menyeluruh bawah gerak kerja Sistem Pentadbiran Kerajaan Malaysia (SPKM) di luar negara.

Beliau berkata, semua penjawat awam perlu sentiasa bergerak secara bersepadu dan meninggalkan amalan lapuk bekerja secara silo (bersendirian).